

ICC-mut tapiissutit 2015-imit 2 mio. kr.-inik qaffanneqarnissaannik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut
Inatsisartunut ilaasortaq Aqqaluaq B Egede, Inuit Ataqatigiit

Akissuteqaat

(Naalakkersuisut Siulittaasuat kiisalu Nunanut Allanut Naalakkersuisoq)

Siullermeerneqarnera

Inatsisartunut ilaasortaq Aqqaluaq B. Egede ICC-mut tapiissutit 2015-imit 2 mio. kr.-inik qaffanneqarnissaannik Naalakkersuisut peqquneqarnissaat pillugu Inatsisartut aalajangiiffigisassaattut siunnersuuteqarpoq. Aningaasanut inatsimmut aningaasat agguataarneqarnerat pillugu kinguneqartussamik oqaloqatigiilluarnermut Naalakkersuisut qujapput. Taamatut sungiusarneq inuiaqatigiinni tunngavigineqartumik oqartussaaqataanitsinnut pingaarutilimmik ilaavoq. Kalaallit Nunataat 1979-imiilli namminersornerullutik oqartussaqalersimapput Namminersorlutillu Oqartussaqalernikkut 2009-mi pisinnaatitaaffeqarnerulerlutik. Taamaattumik qularnanngilaq inatsisartunut ilaasortatta suliaminnik isumaginninnermikkut nunatsinni inuiaqatigiinnut pitsaasussamik siuarsaanissamut pingaarutilimmik inissisimallutillu akisussaaffeqarmata.

Siunnersuummi pingaarutillit, soorlu aatsitassanik piiiaffeqarnerup suliffissuaqarnermillu ineriartortitsinerup kingunerisassai ilisimalluartaqakkavut erseqqissaatigineqarput. Tamatuma saniatigut kulturip, kinaassutsip inuillu pisinnaatitaaffiisa illersorneqarlutillu paarilluarneqarnissaat eqqortumik taakkartorneqarput, taakku ineriartornermit qulaani taaneqartumit ajoquserneqarsinnaammata. Qinigaasugut inuiaqatigiinni ineriartornermut inuiaqatigiinnit akisussaatinneqarlutalu malinnaatinneqarnissarput Inuiaqatigiinni uagutsitut ittuni nukittoqutaasorujussuuvoq imaanngilarli ingiimiataaginnarluta akisussaaffik taanna inuiaqatigiinnut tunniutissagipput. Naggataatigummi Inatsisartunut ilaasortat Naalakkersuisunik suleqateqarlutik tassaapput inuit pisinnaatitaaffiisa malinneqarnissaannik qularnaarisuusussat, kiisalu kulturitsinnik, pingaartitsinnik kinaassutsitsinnillu illersuisuullutillu paarsisuusussat.

Naalakkersuisut soorunami Inatsisartut sinnerlugit oqaaseqarsinnaanngillat erseqqissaatigerusuppaalli 2014-imit Aningaasanut Inatsimmi siunissamilu ICC-mut aningaasaliissutinik ikilisaaneq nunap inoqqaavinut ICC-mullu tunngatillugu Naalakkersuisut pimoorussinnginnerannut takussutissatut isigineqassanngimmat. Inuit pisinnaatitaaffii ICC-lu pillugit Naalakkersuisut pimoorussinerat allanngunngilaq.

Taamaalilluni ICC-mut tapiissutinik ikilisitsiartornissaq 2008-miilli aningaasanut inatsisinut atatillugu eqqartorneqartareerpoq, kiisalu Naalakkersuisuusimasunit kingulliusunit (IA, Demokraatit aamma Kattusseqatigiit) 2010-mi, 2011-mi 2012-imiilu siunnersuutigineqartarsimalluni.

ICC avataanit aningaasassarsiornissamut kaammattorneqarpoq neriuutigarpullu ICC tamatuminniga iluatsitsilluarumaartoq. ICC Alaskami Canadamilu inuit peqatigalugit kinguneqarluartumik aningaasaliisussarsiorsinnaavoq, aamma ICC-p suliarisartakkani nunat tamalaat suliniutaannit aningaasaateqarfiannillu aningaasatigut matussuertinniarlugit kinguneqarluartumik qinnuteqarsinnaavoq. Tassunga atatillugu Nunanut tamalaanut kontomit

aningaasaliineq tassunga atasutut isigineqassaaq, tamatumani 2014-imut Aningaasanut Inatsimmit aningaasaliissutisiamik saniatigut ICC-p ataatsimeersuarnissaanut peqataanissamut 100.000 kr.-inik aningaasaliiffigineqarlutik.

Assersuutit ICC Canada aamma ICC Alaska paasissutissiipput:

- ICC Canada-p 75,000 C\$ missingersuumminit tamakkiisunit 4%-tiata nalinga Nunavut-mi Nunatsiavumilu naalakkersuisuinit pisarparaa.
- Tamakku saniatigut ICC Canada-p Canada-mi naalagaaffeqatigiit naalakkersuisuinit (Aboriginal Affairs & Northern Development Canada, Department of Foreign Affairs and International Trade, Health Canada, Environment Canada aamalu National Research Council Canada)-mi pisortaqarfinit assigiinngitsuni missingersuutimik 57 %-iisa nalingi tigusarpai. Aningaasat taakku ICC-mit qinnutigineqarnerisa kingorna taamaallaat pilersaarutinut piviusunut aningaasaliissutigineqartarput. Pilersaarutini tamani tapiissutit 10-15 %-iisa akornanniittoq allaffissornikkut aningaasartuutitut matussutigineqarsinnaavoq. ICC Canada pineqartut saniasigut naalagaaffeqatigiit naalakkersuisuanit ingerlatsinermut tapiissutinik tigusaqarneq ajorpoq.
- Missingersuutit sinnerisa 35 %-iat allanit erseqqarinnerusumik kikkuunerinik nassiuatitaqanngitsunit pissarsiarineqartarput.

ICC Alaska-p paasititsissutigaa:

- ICC Alaska-p piffimmi oqartussanit tapiissutit pisarpar ICC Alaska-llu ingerlatsinermut aningaasartuutaasa 40 %-it missaaniittunut matussutaasarlutik taamaasillutillu ICC Alaska-p tamakkiisumik missingersuusiap 30 %-iisa missaat.
- ICC Alaska-p USA-p naalagaaffetigiivisa naalakkersuisuinit aningaasat annikitsut pisarpar. Aningaasat taakku ICC Alaska-p Issittumi Siunnersuisoqatigiinni ataatsimiinnernut piviusumik peqataanerat matussutissatut qinnutigineqarnerisa kingorna taamaallaat tunniunneqarsinnaasarput. Issittumi Siunnersuisoqatigiit suliaannut peqataanermut ICC Alaska-p ataatsimut missingersuutaasa tapiissutit taassuma 10 %-eraa, taamaasillunilu ICC Alaska-p tamakkiisumik missingersuutaat 10 %-imik ataaterujussuaropai.
- Naalagaaffeqatigiit naalakkersuisuinit tapiissutit amerlinissaat aningaasaliissutinngorlugit immikkut ittunut pilersaarutinut qinnutigineqartarput. Tapiissutinik pissarsinissaq qulakkeerneqanngilaq, tassami aningaasanik pissarsinissamut unammillernersuaqarami, aammalu ukiut tallimat kingulliit ICC Alaska aningaasaliissutinik annertunerusumik pissarsisimangilaq.
- ICC Alaska Alaska-mi naalagaaffeqatigiinni ilaasumit tapiissutinik tigusaqarneq ajorpoq.
- Missingersuutit sinneri allanit erseqqarinnerusumik kikkuunerinik nassiuatitaqanngitsunit pineqartarput.

Taamaattumik siunnersuut Naalakkersuisut isumaqatiginartinnngilaat.